

Մանկական «Տիկնի պսակ» երաժշտաժեսակայանի ներկայացում

Մաներից երկուսը տիկնիկներով խաղում են, մեկի տիկնիկը տղա է, մյուսինն՝ աղջիկ: Նրանցից մեկը մյուսին հարցնում է.

- Քո տիկնիկի անունն ի՞նչ է:
- Սաթո, բա քոնի՞ անունն ինչ է:
- Հայկո:
- Կգա՞ս տիկնի պսակ խաղանք:
- Կգամ, արի խաղանք:

Միասին երգում են.

Պսակ-պսակ, տիկնի պսակ.
Էկեք խաղանք տիկնի պսակ,
Տիրնանինե, տիրնանինե,
Զուռնի ձենը գեղով մին է...

Մասնակիցները բաժանվում են երեք խմբի՝ նվագաձուներ, հարսնացուի կողմի խնամիներ, տղայի կողմի խնամիներ:

Հարսի տիկնիկով երեխան.

- Կլորիկ ու թմբլիկ եմ,
Պստլիկ ու ճստլիկ եմ,
Քիթս պուճուր – պուճուրիկ է,
Աչուկներս սևուլիկ են,
Կա՞ ինձ նման սիրունիկը:

Բոլորը միասին՝

- Չկա՛, չկա՛, չկա՛:

Հարսի մայրը.

- Աղջիկ ունիմ օղերով,

Հարս պիտ անիմ քողերով,
Աղջիկ ունիմ հարսնացու,
Կտրիճ կուզիմ փեսացու:
Ո՞րին տամ, ո՞րին չտամ:

Փեսայի կողմի խնամհները.

- Մեր տղային տուր:

Հարսի մայրը.

- Տա՞մ, թե՞ չտամ:

Փեսայի կողմի խնամհները.

- Տո՛ւր, տո՛ւր, լավ տղա է:

Կողքից մեկն ասում է.

- Սպասե՛ք, բա չիմանա՞նք՝ հարսն ում է ուզում:

Հարսի մայրը.

- Լավ, ում որ կուզի, նրան կտամ:

Հարսիկի տիկնիկը ձեռքին աղջիկը գնում կանգնում է փեսայի տիկնիկը բռնած տղայի կողքին:

Բոլորը միասին. - Հարսը փեսին հալալ է:

Միասին երգում են «Պսակ, պսակ», «Այ ֆռոկա» երգերը

Պսակ-պսակ, տիկնի պսակ.
Փեսեն էկավ՝ լիքը քսակ –
Տիրնանինե, տիրնանինե,
Զուռնի ձենը գեղով մին է...

Բոյը՝ չինար, մեջքին՝ քամար,
Աչքերը՝ ծով, ունքը՝ կամար –
Տիրնանինե, տիրնանինե,
Զուռնի ձենը գեղով մին է...

Այ ֆոռկա

Այ ֆոռկա, ֆոռկա, ֆոռկա,
Էսօր մեր տուն հարսնիս կա,
Էսօր մեր տուն հարսնիս կա,
Կոլոտ փեսին բեղ չկա:

Այ ֆոռկա, ֆոռկա, ֆոռկա,
Էսօր մեր տուն հարսնիս կա,
Թավեն ծակ է, եղ չկա,
Փեսեն էկավ՝ տեղ չկա:

Այ ֆոռկա, ֆոռկա, ֆոռկա,
Էսօր մեր տուն հարսնիս կա:

✓ Աղջիկները շրջապատում են աղջկա տիկնիկին (փնջատուն), մի կողմ
են տանում ու գովում. Ձեր տուն մտնի հազար բարի,
Հաճար, ցորեն, կորեկ, գարի,
Լիքը հորեր շատ ունենաք,
Կարմիր օրեր շատ ունենաք,
Կարմիր օրով, կարմիր շորով,
Ուրախ կենաք՝ լիքը տնով:

Աղջկե՛ք, պար բռնեցեք,
Սաթոյի աչեր գովեցեք:
Ա՛յ աչեր, սիրուն աչեր,
Արևի պես փայլուն աչեր:

Տղաների խումբը, որը շրջապատել է տղայի տիկնիկին, գովում է.

Ջա՛ն, տղե՛ք, պար բռնեցեք,
Հայկոյի կոներ գովեցեք:
Ա՛յ կոներ, ուժեղ կոներ,

Դուք կշարժեք մեծ-մեծ լեռներ:

Գալիս է տերտերը

Պսակ, պսակ, տիկնի պսակ, արջի քուլու, դեղին դմակ,
Կուժն ու կուլեն գլխիդ կոտրեմ, տեր ես, թե՛ չէ:

Փեսան

– Տե՛ր եմ:

Բոլորը միասին բացականչում են.

– Տե՛ր է՛:

Տերտերը

Պսակ, պսակ, տիկնի պսակ, արջի քուլու, դեղին դմակ,
Կուժն ու կուլեն գլխիդ կոտրեմ, հնազանդ ես, թե՛ չէ:

Հարսը

– Հնազանդ եմ:

Բոլորը միասին բացականչում են.

– Հնազանդ է՛:

Միասին երգում են «Ծառ ծաղկեցավ» երգը:

Սուրբ Կարապետա օրհնութենով, օրհնութենով
Ծառս ի ծաղկեցավ, ծառս ի ծաղկեցավ,
Ծառ ծաղկեցավ, ճյուղ բազմեցավ՝
Կանաչ ու կարմիր:

Բարեմաղթանքներ՝

✓ Կարասն ձեր լցվի գինով,
Եվ տունը ձեր՝ շեն բարիքով:

✓ Ձեր տուն մտնի հազար բարի,
Հաճար, ցորեն, կորեկ, գարի,
Լիքը հորեր շատ ունենաք, Կարմիր օրեր շատ ունենաք,
Կարմիր օրով, կարմիր շորով,
Ուրախ կենաք՝ լիքը տնով: